

DOMENIE VII DI PASCHE

Antifone di jentrade cf. Sal 26,7-9

Scolte, Signôr, la vôs dal gno berli.
Il gno cûr a ti ti fevele, ti cîr la mê muse.
La tô muse, Signôr, o voi cirintle.
No sta platâmi alore la tô muse, aleluia.

Si dîs Glorie a Diu.

Colete

Signôr, scolte ben disponût lis nestrîs preieris
par che il Salvadôr de gjernazie umane,
che par fede o crodìn te glorie de tô maiestât,
nus fasi sintî che al è presint framieç di nô fin a la fin dal mont
come che lui stes nus à imprometût.
Lui che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 1,15-17.20-26

Bisugne che un al deventi testimoni de sô resurezion insiemi cun nô.

Dai Ats dai Apuestui

In chei dîs Pieri al jevà sù tal mieç dai fradis – si jerin dâts dongje un cent e vincj di lôr – e ur disè:
«Fradis, al veve di sucedi ce che, te Scriture, il Spirtu Sant al veve dit denant trat par bocje di David
a rivuart di Jude, che si è metût in teste di chei che a àn cjapât Jesù. Al jere dai nestrîs e al veve
vude une part ancje lui te nestre stesse incariche. E di fat tal libri dai Salms al è scrit: “Il so puest
che lu cjapi un altri”».

Bisugne partant che, di chei che nus àn compagnâts par dut il timp che il Signôr Jesù al à vivût
framieç di nô, scomençant dal batisim di Zuan fintremai a la dì che nus è stât puartât sù in cîl, un al
deventi testimoni de sô resurezion insiemi cun nô».

Int presentarin doi: Josef, che i disevin Barsabe e par sorenon Just, e Matie. A faserin cheste preiere:
«Signôr, tu che tu cognossis i cûrs di ducj, fasinus savê, di chescj doi, chel che tu âs sielzût par che
al cjapi, tal servizi di apuestul, l’incariche lassade sfurnide di Jude, lâ a finîle tal puest che i
competeve». Po dopo a tirarin bruscjete e i tocjà a Matie, che al è stât contât cui undis apuestui.
Peraule di Diu.

SALM RESPONSORIÂL dal Salm 102

R. Benedet il Signôr tal plui alt dai cîi.

O ben:

R. Aleluia, aleluia, aleluia.

Benedis, anime mê, il Signôr,
dut ce che al è in me il so non sant al benedissi.
Benedis, anime mê, il Signôr,
e no sta lassâ in dismentie nissun dai siei plasês. R.

Come che al è alt il cîl a preference de tiere,
cussì al è grant il so boncûr sun chei che lu rispjetin;
come che al è lontan dal amont il jevâ dal soreli,
cussì al à slontanât di nô lis nestrîs colpis. R.

Il Signôr al à tirade sù adalt tal cîl la sô sente,

il so ream al rive sun ogni robe.
Benedît il Signôr, vualtris siei agnui,
vualtris brâfs, che o fasês ce che us comande. **R.**

SECONDE LETURE 1 Zn 4,11-16

Chel che al sta tal amôr al reste in Diu e Diu al vîf in lui.

De prime letare di san Zuan

Miei cjârs, se Diu nus à volût ben, ancje nô o vin di volêsi ben un cul altri. Diu no lu à mai viodût nissun; se si volin ben un cul altri, Diu al reste in nô e il sô amôr in nô al è refinît. Di chest si ricognòs che nô o restin in lui e lui in nô: lui nus à regalât il so Spirt. E propit nô o vin viodût e o sin testimonis che il Pari al à mandât so Fi sicu salvadôr dal mont. Se un al ricognòs che Jesù al è Fi di Diu, Diu al reste in lui e lui in Diu. Nô o vin ricognossût e crodût al amôr che Diu al à par nô. Diu al è amôr; chel che al sta tal amôr al reste in Diu e Diu al vîf in lui.

Peraule di Diu.

CJANT AL VANZELI cf. Zn 14,18; 16,22

R. Aleluia, aleluia.

No us lassarai vuarfins, al dîs il Signôr:
o tornarai di vualtris e il vuestri cûr al sarà plen di gjonde.

R. Aleluia.

VANZELI Zn 17,11-19

Che a sedin un come nô.

Dal vanzeli seont Zuan

In chê volte, alçâts i vôi viers dal cîl, Jesù al preà disint: «Pari sant, tenju cont tal to bonvolê chei che tu mi âs dât, par che a sedin un come nô.

Cuant che o jeri cun lôr, jo o tignivi cont tal to non chei che tu mi âs dât e o ài viodût di lôr e nissun di lôr no si è pierdût, fûr dal fi de perdizion, par che si colmàs la Scriture. Cumò jo o ven di te e chestis robis ur es dîs biel che o soi tal mont, par che a vedin in lôr la mê gjonde in dute la sô plenece. Jo ur ài dade la tô perauale e il mont ju à odeâts, parcè che no son dal mont, come che nancje jo no soi dal mont.

No ti domandi che tu ju tiris vie dal mont, ma che tu ju tegnìs vuardâts dal trist. Lôr no son dal mont, come che nancje jo no soi dal mont. Fasiju sants te veretât. La tô perauale e je veretât. Come che tu tu mi âs mandât me tal mont, cussì ancje jo ju ài mandâts lôr tal mont. E par lôr jo mi fâs sant me par che ancje lôr a sedin fats sants te veretât».

Peraule dal Signôr.

Si dîs O crôt.

Su lis ufiertis

Acete, Signôr, lis preieris dai fedêi
dutune cu l'ufierte dal sacrifici,
par che, in grazie di chest at di sante religjon,
o podin rivâ a la glorie dal cîl.
Par Crist nestri Signôr.

Antifone a la comunion Zn 17,22

Ti prei, Pari, che a sedin un,
come che o sin un ancje nô, aleluia.

Daspò de comunion

Scoltinus, Diu, nestri Salvadôr,
par che midiant di chescj sacrisants misteris
o podìn sperâ che in dut il cuarp de Glesie
si colmi ce che i à za sucedût al so cjâf.
Par Crist nestri Signôr.